

O‘ZBEKISTON RESPUBLIKASI XALQ TA’LIMI VAZIRLIGI  
O‘ZBEKISTON RESPUBLIKASI MOLIYA VAZIRLIGINING  
QARORI

**OTA-ONALAR TOMONIDAN BOLALARNING BOLALAR MUSIQA VA SAN’AT  
MAKTABLARIDA O‘QISHI UCHUN HAQ TO‘LASH VA UNDAN FOYDALANISH  
TARTIBI TO‘G‘RISIDAGI NIZOMNI TASDIQLASH HAQIDA**

**[O‘zbekiston Respublikasi Adliya vazirligi tomonidan 2009-yil 5-fevralda ro‘yxatdan  
o‘tkazildi, ro‘yxat raqami 1898]**

O‘zbekiston Respublikasi Prezidentining 2008-yil 8-iyuldagi PQ-910-sonli “Bolalar musiqa va san’at maktablarining moddiy-texnik bazasini mustahkamlash va ularning faoliyatini yanada yaxshilash bo‘yicha 2009 — 2014-yillarga mo‘ljallangan Davlat dasturi to‘g‘risida”gi qaroriga (O‘zbekiston Respublikasi qonun hujjatlari to‘plami, 2008-y., 28-son, 267-modda) muvofiq O‘zbekiston Respublikasi Xalq ta’limi vazirligi va Moliya vazirligi qaror qiladi:

1. Ota-onalar tomonidan bolalarning bolalar musiqa va san’at maktablarida o‘qishi uchun haq to‘lash va undan foydalanish tartibi to‘g‘risidagi nizom ilovaga muvofiq tasdiqlansin.

2. Mazkur qaror O‘zbekiston Respublikasi Adliya vazirligida davlat ro‘yxatidan o‘tkazilgan kundan boshlab o‘n kun o‘tgach kuchga kiradi.

**Xalq ta’limi vaziri G‘. ShOUMAROV**

Toshkent sh.,  
2008-yil 31-dekabr,  
46-son

**Moliya vaziri R. AZIMOV**

Toshkent sh.,  
2008-yil 31-dekabr,  
121-son

## **Ota-onalar tomonidan bolalarning bolalar musiqa va san'at maktablarida o'qishi uchun haq to'lash va undan foydalanish tartibi to'g'risida**

### **NIZOM**

Mazkur Nizom O'zbekiston Respublikasi Prezidentining 2008-yil 8-iyuldagi PQ-910-sonli "Bolalar musiqa va san'at maktablarining moddiy-texnik bazasini mustahkamlash va ularning faoliyatini yanada yaxshilash bo'yicha 2009 — 2014-yillarga mo'ljallangan Davlat dasturi to'g'risida"gi qaroriga (O'zbekiston Respublikasi qonun hujjatlari to'plami, 2008-y., 28-son, 267-modda) muvofiq bolalar (o'quvchilar)ning (bundan keyingi o'rinlarda bolalar deb yuritiladi) bolalar musiqa va san'at maktablarida o'qishi uchun to'lanadigan to'lovning miqdori, uni to'lash va undan foydalanish tartibini belgilaydi.

### **I. Umumiy qoidalar**

1. Mazkur Nizom Davlat budjeti tomonidan moliyalashtiriladigan bolalar musiqa va san'at maktablariga taalluqlidir.

2. Bolalar musiqa va san'at maktablarida o'qish uchun to'lanadigan to'lovlar qonunchilik hujjatlarida belgilanadigan miqdorlarda undiriladi.

### **II. O'qish uchun to'lovni amalga oshirish tartibi**

3. Bolalar musiqa va san'at maktablarida bolalarning ta'lim olishlari uchun to'lovlar ota-onalar yoki ularning o'rnini bosuvchi shaxslar (bundan keyingi o'rinlarda ota-onalar deb yuritiladi) va maktab ma'muriyati tomonidan tuzilgan shartnoma asosida amalga oshiriladi.

4. Bolalar musiqa va san'at maktablarida o'qish uchun to'lanadigan to'lov o'quv yili (sentyabr — may oylari) uchun to'lanadi. To'lovlar har oyda kelgusi oyning 5-sanasi dan kechikmasdan to'lanadi.

5. Bolaning kasalligi davrida (2 haftadan kam bo'lmaganda) bolalar musiqa va san'at maktabida o'qish uchun to'lov olinmaydi. Bunda, bolaning kasalligi to'g'risida ota-onaning arizasi va davolash muassasasidan yoki hudud shifokoridan olingan ma'lumotnoma taqdim etilishi zarur.

6. Bolalar musiqa va san'at maktablarida o'qish uchun amalga oshiriladigan to'lov tegishli xizmat ko'rsatuvchi bankka to'lanadi va to'lov to'langanligini tasdiqlovchi hujjat (kvitansiya) nusxasi bolalar musiqa va san'at maktabiga taqdim etiladi.

7. Agar to'lov naqd pulsiz shaklda amalga oshirilgan bo'lsa, bolalar musiqa va san'at maktabiga to'lov topshiriqnomasining nusxasi (to'lov to'langanligi to'g'risidagi bank belgisi qo'yilgan holda) taqdim etiladi.

8. To'lov bolalar musiqa va san'at maktablariga xizmat ko'rsatuvchi tegishli g'aznachilik bo'linmalarining hududiy g'aznachilik hisob raqamlariga o'tkaziladi va tegishli bolalar musiqa va san'at maktabining shaxsiy g'azna hisobvaraqlariga undan keyinchalik foydalanish uchun hisobga olinadi.

9. Agar to'lov ushbu Nizomning 4-bandida ko'rsatilgan muddatdan ikki hafta mobaynida uzrli sabablarsiz to'lanmagan taqdirda, o'quvchilar bolalar musiqa va san'at maktabi ro'yxatidan chiqariladi.

10. Bolaning bolalar musiqa va san'at maktabida ta'lim olganligi uchun mavjud bo'lgan qarzdorlik bir oy ichida to'langan taqdirda, bola mazkur sinfning o'quv dasturlari talablarini bajargandan so'ng o'quvchilar safiga qayta tiklanadi. Bola o'qishni tegishli to'lovni amalga oshirgan holda keyingi o'quv yilida (o'tgan o'quv yilining tugatilmagan choragining birinchi oyidan) davom ettirishi mumkin.

### **III. O'qish uchun to'lovlardan ozod etish hamda o'qituvchi va konsertmeysterlarga har oylik ustamalar belgilash bo'yicha Komissiyaning faoliyati**

12. Har bir bolalar musiqa va san'at maktabida o'qish uchun to'lovlardan ozod etish va o'qituvchi hamda konsertmeysterlarga har oylik ustamalar belgilash bo'yicha Komissiya (bundan buyon matnda Komissiya deb yuritiladi) tuziladi.

13. Komissiya maktab direktori buyrug'i asosida 5 — 7 kishidan iborat bo'lgan tarkibda tayinlanadi.

Komissiya raisi — bolalar musiqa va san'at maktabi direktori.

Komissiya a'zolari — ma'naviy-ma'rifiy va o'quv ishlari bo'yicha direktor o'rinbosari (mas'ul kotib), bolalar musiqa va san'at maktabining kasaba uyushmasi qo'mitasining raisi, ikki yetakchi o'qituvchi va ota-onalar qo'mitasining ikki vakili.

14. Komissiyaning asosiy vazifasi quyidagilar hisoblanadi:

a) o'quv yilining boshlanishida, zarur hollarda o'quv yili davomida ota-onalarni bolalarning o'qishi uchun belgilangan to'lovdan ozod etish masalasini ko'rib chiqish;

b) o'quv yilining boshlanishida, shuningdek, zarur hollarda o'quv yili davomida oylik ustama belgilash bo'yicha o'qituvchi va konsertmeysterlarning nomzodlarini ko'rib chiqish hamda har oylik ustama belgilash.

v) o'qish uchun to'lanadigan to'lovdan ozod etiladigan bolalarning ro'yxatini shakllantirish va tasdiqlash.

15. Komissiya kelib tushgan hujjatlarni ko'rib chiqib, tegishli qaror qabul qiladi. Mazkur qaror tegishli buyruq chiqarish uchun bolalar musiqa va san'at maktabi direktoriga yuboriladi.

16. O'qituvchi va konsertmeysterlarga ustama belgilash uchun nomzodlarni ko'rib chiqishda bolalar musiqa va san'at maktablarining bo'linma mudirlari Komissiyaga o'qituvchi va konsertmeysterlarning tarbiyaviy va sinfdan tashqari ishlari, kasbiy mahorati, o'qitish sifati va yuksak ko'rsatkichlari, shuningdek o'quv yili davomida bajarilgan uslubiy ishlari to'g'risida tavsifnomalar taqdim etishlari kerak.

17. Komissiya, zarur hollarda, o'quv yili boshida belgilangan ustamalar miqdorining muddatidan oldin o'zgarganligi to'g'risida qaror qabul qiladi.

### **IV. O'qish uchun to'lovlardan ozod qilish tartibi**

18. Bolalar musiqa va san'at maktablarida o'quvchilar umumiy sonining 25 foizi doirasida bolalarning quyidagi toifalari to'lovdan ozod etiladi:

musiqa va san'at yo'nalishlari bo'yicha xalqaro (1 — 3-o'rinlar) va respublika (1-o'rin) tanlovlarida g'olib bo'lgan bolalar — bir kalendar yil mobaynida (g'olib deb e'lon qilingandan keyingi oydan boshlab 12 oy mobaynida);

kam ta'minlangan oilalardan bo'lgan bolalar.

19. Musiqa va san'at yo'nalishlari bo'yicha xalqaro (1 — 3-o'rinlar) va respublika (1-o'rin) tanlovlarida g'olib bo'lgan bolalarni bir kalendar yil mobaynida o'qitish uchun to'lovdan ozod etishga ularning tanlovda g'olib bo'lganligini tasdiqlovchi hujjati asos bo'ladi.

20. Kam ta'minlangan oilalarning bolalarini to'lovdan ozod etish uchun quyidagi hujjatlar taqdim etilishi lozim:

a) ota-onalarning arizasi;

b) oilaning kam ta'minlanganligi to'g'risida fuqarolarning o'zini o'zi boshqarish organlari tomonidan beriladigan ma'lumotnoma.

21. Oilaning bir a'zosiga bir oyda to'g'ri keladigan jami daromadi eng past darajada bo'lgan kam ta'minlangan oilalarning bolalari to'lovdan ozod etiladigan bolalarning ro'yxatiga birinchi navbatda kiritiladi.

Ro'yxatga kirmagan kam ta'minlangan oilalarning bolalaridan zaxira shakllantiriladi.

22. To'liq davlat ta'minotida bo'lgan yetim bolalar va ota-ona qaramog'idan mahrum bo'lgan bolalar ham bolalar musiqa va san'at maktablarida o'qish uchun belgilangan to'lovlardan ozod etiladi.

23. To'liq davlat ta'minotida bo'lgan yetim bolalar va ota-ona qaramog'idan mahrum bo'lgan bolalarning o'qishi uchun to'lovdan ozod etishga xalq ta'limi muassasalari faoliyatini metodik ta'minlash va tashkil etish tuman (shahar) bo'limlari tomonidan berilgan ma'lumotnoma asos bo'ladi.

23<sup>1</sup>. Agarda bir oilaning ikki va undan ortiq farzandi bolalar musiqa va san'at maktablarida o'qisa, ulardan har birining o'qishi uchun belgilangan to'lovning 70 foizi miqdorida to'lov amalga oshiriladi.

23<sup>2</sup>. To'lovdan ozod etiladigan bolalarning ro'yxati Komissiyaning qarori bilan tasdiqlanadi hamda mazkur qaror asosida bolalar musiqa va san'at maktabi direktorining buyrug'i chiqariladi.

## **V. Ota-onalarning to'lovidan tushgan mablag'lardan foydalanish tartibi**

24. O'qish uchun ota-onalar to'lovidan tushgan mablag'lar birinchi navbatda bolalar musiqa va san'at maktablarini saqlash xarajatlariga (ish haqi va unga tenglashtirilgan to'lovlar, yagona ijtimoiy to'lov bundan mustasno) yo'naltiriladi. Tushumlarning qolgan qismi quyidagi tartibda taqsimlanadi:

a) 40 foizgacha — maktab pedagog xodimlari umumiy sonining ko'pi bilan 50 foizini qamrab olgan holda o'qituvchi va konsertmeysterlar bazaviy tarif stavkasining 40 foizigacha bo'lgan miqdorda har oylik ustamalar shaklida rag'batlantirishga, shuningdek o'quvchilari xalqaro ko'rik-tanlov va festivallarda 1, 2, 3, 4-o'rinlarni egallagan o'qituvchi va konsertmeysterlarga tegishincha eng kam oylik ish haqining 10, 9, 8, 7 barobari miqdorida, respublika tanlovlarida 1, 2, 3-o'rinlarni egallaganligi uchun esa tegishincha eng kam ish haqining 6, 5, 4 barobari miqdorida mukofotlashga;

b) 20 foizgacha — o'quvchi, o'qituvchi va konsertmeysterlarni tanlovlar, festivallar, ustoz saboqlari hamda ijodiy maktablardagi mashg'ulotlarga borishi, shuningdek o'quvchilarning teatr, muzey, konsertlarga tashrifi bilan bog'liq xarajatlarini to'lashga, maktabda madaniy-ommaviy tadbirlarni tashkil etish va o'tkazishga;

v) qolgan mablag'lar — mavjud kreditorlik qarzlarini qoplashga va moddiy-texnik bazani mustahkamlashga (bino va inshootlarni, mebel, musiqa asboblari va jihozlarni kapital va joriy ta'mirlashga, shuningdek mebel, uskunalar, musiqa asboblari, o'quv qo'llanmalari, adabiyotlar va boshqa zarur jihozlar sotib olishga).

25. Ota-onalar to'lovidan tushgan mablag'larning taqsimlanishi Komissiya qarori asosida maktab direktori buyrug'i bilan tasdiqlanadi.

26. O'qituvchi va konsertmeysterlarga belgilanadigan ustama miqdori ularning o'quv-tarbiyaviy va sinfdan tashqari ishlari, o'quv jarayoniga qo'shgan shaxsiy hissasi uchun 100 ballik tizim asosida mazkur Nizomning 1-ilovasiga muvofiq baholanadi. Ulardan:

80 va undan ko'p ballni to'plagan o'qituvchi va konsertmeysterlarga bazaviy tarif stavkasining 15 foizigacha ustama belgilanadi;

70 balldan 80 ballgacha to'plagan o'qituvchi va konsertmeysterlarga bazaviy tarif stavkasining 10 foizigacha ustama belgilanadi;

60 balldan 70 ballgacha to'plagan o'qituvchi va konsertmeysterlarga bazaviy tarif stavkasining 5 foizigacha ustama belgilanadi.

27. O'qituvchi va konsertmeysterlarga belgilanadigan ustama miqdori ularning kasbiy mahorati uchun 100 ballik tizim asosida mazkur Nizomning 2-ilovasiga muvofiq baholanadi. Ulardan:

80 va undan ko'p ballni to'plagan o'qituvchi va konsertmeysterlarga bazaviy tarif stavkasining 25 foizigacha ustama belgilanadi;

70 balldan 80 ballgacha to'plagan o'qituvchi va konsertmeysterlarga bazaviy tarif stavkasining 15 foizigacha ustama belgilanadi;

60 balldan 70 ballgacha to'plagan o'qituvchi va konsertmeysterlarga bazaviy tarif stavkasining 10 foizigacha ustama belgilanadi.

## **VI. Buxgalteriya hisobi va hisoboti.**

28. O'qish uchun to'lanadigan to'lovning tushumi va sarflanishi bo'yicha buxgalteriya hisobini yuritish va hisobotlarni tuzish tegishli musiqa va san'at maktabining buxgalteriyasi tomonidan amalga oshiriladi.

29. Ota-onalar to'lovining hisoblanishi, tushumi va uning ishlatilishi buxgalteriya hisob-kitobida qonunchilik hujjatlarida belgilangan tartibda buxgalteriya qaydnomalari orqali rasmiylashtiriladi.

## **VII. Yakuniy qoidalar**

30. O'zbekiston Respublikasi Xalq ta'limi vazirligi va uning hududiy boshqarmalari ota-onalar tomonidan to'lovni amalga oshirish va pedagog xodimlarga belgilanadigan ustamalarning monitoringini olib boradi.

31. Bolalar musiqa va san'at maktabining rahbari va bosh hisobchisi ota-onalar to'lovi tushumini maqsadli sarflash bo'yicha javobgar hisoblanadi.

32. Moliya vazirligining nazorat-taftish bosh boshqarmasi va uning hududiy boshqarmalari tomonidan bolalar musiqa va san'at maktablarida o'qish uchun to'lanadigan ota-onalar to'lovidan tushgan mablag'larning o'z vaqtida qabul qilinishi, shuningdek, maqsadli sarflanishi hamda pedagog va konsertmeysterlarning ustamalari miqdorini hisoblashning to'g'ri taqsimlanishi bo'yicha nazorat olib boriladi.

33. Ushbu Nizom talablarini buzilishida aybdor bo'lgan shaxslar qonunchilik hujjatlariga muvofiq javobgar bo'ladi.

Ota-onalar tomonidan bolalarning bolalar musiqa va san'at maktablarida o'qishi uchun haq to'lash va undan foydalanish tartibi to'g'risidagi nizomga  
1-ILOVA

### **O'quv-tarbiyaviy va sinfdan tashqari ishlarning asosiy ko'rsatkichlari**

<b>T/r</b>	<b>Baholashning yuqori bali</b>	
1.	Ota-onalar bilan ishlashning pedagogik maqsadga muvofiq ko'rsatkichlari va o'sib kelayotgan yosh avlodning ma'naviy saviyasini ko'tarish va iqtidorini rivojlantirganlik bo'yicha	20 ball
2.	Maktab jamoat ishlaridagi faol ishtiroki uchun	10 ball
3.	"Musiqa madaniyati va san'ati" fani bo'yicha umumta'lim maktablariga uslubiy yordam berganlik va hamkorlik qilganligi uchun	20 ball
4.	Umumta'lim maktablari, mehribonlik uylari, mahallalar va boshqa ta'lim muassasalarida o'quvchilarning konsertlarini tashkil etish va o'tkazish uchun	20 ball
5.	O'quvchilarning konsertlar, muzeylar, teatr va ko'rgazmalarga olib borishini tashkil etganligi uchun	10 ball
6.	Bolalar musiqa va san'at maktablarida ta'lim olish uchun o'quvchilarni qabul qilish bo'yicha targ'ibot ishlarini olib borganligi uchun	20 ball

Ota-onalar tomonidan bolalarning bolalar musiqa va san'at maktablarida o'qishi uchun haq to'lash va undan foydalanish tartibi to'g'risidagi nizomga  
2-ILOVA

### **O'qituvchi va konsertmeysterlar mahoratining asosiy ko'rsatkichlari**

<b>T/r</b>	<b>Baholashning yuqori bali</b>	
1.	Yuksak mahorat va ta'lim jarayoniga qo'shgan shaxsiy hissasi hamda o'qitishning yuqori ko'rsatkichlari va sifati uchun	15 ball
2.	Ishda ta'limning eng yangi metodlarini qo'llash, o'quv-tarbiyaviy ishlarning zamonaviy shakllarini joriy etish, o'qitadigan faniga qiziqish uyg'ota bilish uchun	20 ball
3.	Bolalar musiqa va san'at maktabining rivojiga qo'shgan hissasi, ta'lim muassasasining jamoat ishlaridagi faol ishtiroki uchun	20 ball
4.	O'z ustida doimiy ravishda ishlash, yuqori malaka va professional mahorat uchun	10 ball
5.	Bilim olishning barqaror darajasini, testlar asosida aniqlanuvchi (akademik konsertlar, imtihonlar) ta'limning yuqori sifatini ta'minlovchi pedagogik ishning yuqori samarasi uchun	10 ball
6.	Iqtidorli o'quvchilar bilan alohida ishlashni tashkil etish, xalqaro va respublika ko'rgazma-tanlovlarida yuqori natijalarga erishish uchun	20 ball
7.	Iqtidorli o'quvchilarni ushbu yo'nalishi bo'yicha akademik litsey va kollejlarga kirishga tayyorlash uchun	5 ball